



Qanoq iliorluta nioqutissat nunarsuatsinni akiisa sorsunnerup kingunerisaanik qaffakkiartupiluulernerat innuttaasunut kingunerluutaannginnerpaamik inissinniarlugu suliarisinnaavarput?

(Siumup Inatsisartunut ilaasortaaitai)

Aallaqqaatigalugu Siumut qutsaviginiarpara una oqallisissianngortimmassuk. Isumaqarpunga, pingaartuusooq, maannangaaq oqaluuserissallugu, qanoq iliussanerluta, akit qaffaataasa nunarput eqqorpasuk. Apeqqutaaginnarunarpormi, qaqugu pissanersooq – pinngitsoornissaaninngarnik.

Pingaartuuvoq, eqqarsarluarnissarput. Danmarkimi toqqarneqarsimavoq inuit aaliangersimasut tapiiffigissallugit. Kusanaalaarpoq takullugu, qanoq danskit naalakkersuisuisa tungaanniit inuit aaliangersimasuinaat ikiorneqarnerat, ersarilluinnartumik partiit naalakkersuisuutitaqartut qinersisai. Uggornassaqaq, uagut tamakkuninnga isummanik malinnissagutta.

Isumaqarpunga maani nunatsinni, torraanerusumik eqqarsartariaqartugut. Isumaqarpungalu, sinaakkutit pioreersut atortariaqarigut, taamaalilluta allaffissornerujussuaq aqquusaaqqaassannginnatsigu aningaasat innuttaasut kaasarfiinut ingerlatinnissaannut.

Demokraatinut taamaattumik orniginarpoq akileraarnermi ilanngaati isiginiarnissaa aamma ulluinnarni nioqutissanut akitsuutit. Taakku atorlugit qularnaarsinnaavarput, inuit aningaasaatimik amerlanersaasa pigiinnarnissaat imaluunniit qularnaarsinnaallugu, akit qaffatsaalinnissaat imaluunniit immaqa, appartinnissaat angusinnaallugu.

Demokraatit siunnersuutaat unaavoq.

-Akileraarnermi ilaanggat erngerluinnartumik qaffatsigu. Qanoq annertutigisumik qaffanneqassanersooq politikikkut isumaqatiginninniarnarup takutikkumaarpaa. Suliniutip taassuma akit qaffanneqarnissaat pinngitsoortissinnaanngilaa, taamaattorli qularnaarsinnaallugu kikkut tamarmik annertunermik isertitaqarnissaat, taassumalu kingunerissallugu, innuttaasut akit qaffannerinut akissaqalernerat.

-Utaqqiisaagallartumik – soorlu assersuutigalugu ukiup affaa imaluunniit ukioq iluitsooq – ulluinnarni nioqutissanut akitsuutit tamaasa peertigit. Tassa ima isumaqarpoq neqinut, sukkumut, sukkulaatinut, imermut, sodavandinut allanullu akitsuutit tamarmik peerneqarlik. Taamaaliornikkut ulluinnarni nioqutissat akiisa apparnissaat qulakkeerneqassaaq, taamaalillunilu, akit qaffaataat pisussaagaluamit annikinnerulissalluni. Immaqa akitsuutit affaannanngortinneqarsinnaapput imaluunniit akitsuutit ilaat annertuumik appartinneqarsinnaallutik. Tunngavippiaa tassaavoq qulakkiissallugu, innuttaasut pisisinnaassusaasa nikisippallaannginnissaa naak akit qaffanneqaraluartut.

Tassuma saniatigut assartuinnermut akit qiviarsinnaavagut, coronap kinguneranik annertoourujussuarmik qaffassimasut. Assersuutigalugu containeri nillataartitsivik nalinginnaasooq 40 fodimik annertussusilik tuniluunnersuaqarnerata siornatigut 17.000 aamma 30.000 koruunit akornanni Kangianiit Danmarkimut



assartornera akeqarsimavoq. Maannakkut 100.000 aamma 130.000 koruunit akornanni akeqarpoq. Qaffaat amiilaarnaqaaq. Taakku saniatigut containeri nillartaartitsivik nalinginnaasoq 40 fodimik annertussusilik Danmarkimit Kalaallit Nunaannut nassiunnera 80.000 koruuninik akeqarpoq – malugalugu ikummatissap nunat allat aningaasaataasa nikerartarnerannut iluarsisutit qaffannerisa kingulliit SIORNA. Tassa taamani iluarsisut ”15 procent missaaniiginnarallarmat”. Nunarsuarmi assartuinermi akigitinneqartut iliuseqarfigisinnaangilagut, namminerli ingerlatagut iliuseqarfigisinnaavagut. Taamaattumik pingaaruteqarluinnarpoq Royal Arctic Line immakkullu assartuinerup unammillissutaalernissaata oqallisigineqalernissaa.

Allaffissornerujussuup naalleraatitsinera aamma isiginiartariaqarparput, nammineerluta pilersitarput ulluinnarni nioqqutissanik eqqussuunitsinni. Inuussutissarsiortunit ilisimatinneqarpunga, ajornartorsiut annertoorujussuusoq. Tamatumunnga assersuut tupinnaannartoq unaavoq, agurkit tamarmik Islandimit eqqunneqartut ataasiakkaarlugit oqartussaasunit naqissuserneqartussaammata. Allatut oqaatigalugu, allaffissornerujussuup annikillisarneratigut ingerlatsinermi sipaarsinnaavugut, avatitsinnut ,nueqatigiinnissamut isumaqatigiissutit pitsaannerusut anguniarlugit, aammalu akitsuusersuinnginnissaq qulakkeerniarlugu, tamanna ajornassangippat.

Tassa tamakku Demokraatit oqallinnermut oqariartuutigallagaat.